

ጳውሎስ ቆላሲያሴ ኣሳሰ ጳፊዳ ኪታ ጊዶ ቆፋ

ሃይሲ ኪታዚ ጳፊቲዳይ ቁሪ ኢሲያን ዲዛ ኤፌሶኔ ካታማፔ ኣርሼይ ሞኪዛ ባጋራ ዲዛ ቆላሲያሴ ካታማን ዲዛ ዎሳ ኬላሳ፤ ሂኖ ሄ ዎሳ ኬላዮ ኤሲዳይ ጳውሎሳ ጊዶንታ ኣጊኮካ ኢዛ ኦሮሜ ካዎቴላ ጋርሳን ዲዛ ኢሲያን ዎና ካታማ ጊዱዳ ኤፌሶኔፔ ሚሺራቾ ቃላ ዮቲዛይታ ሄ ዬዲዳ ጊሻሰ ቆላሲያሴሰካ ኣላፊቴላ ዴሰ፤ ቆላሲያሴ ዎሳ ኬላን፤ «ጳሳ ኤራናሲኔ ሙሌራ ኣቶቴላ ዴማናሰ ኢሲ ኢሲ ኣሲ ሁኤን ሁኤን ዎልቃማ ኣያናታሲኔ ጎዳታሰ ጎይናናሰ ኮሼሰ» ጊዛ ዎርዶ ኣሰታማሬቲ ዲዛይሳ ጳውሎስ ሲዪዴሰ፤ ሄ ኣሰታማሬቲ ታማርሲዛ ሃራ ዮቲ፤ «ኣሲ ዉሪካ ቃጸራ ዎጋሰ ሃሬታናሰ ቤሴሰ፤ ካላ ሙሳ ዎጋኔ ሃራ ዎጋታካ ናጋናሰ ቤሴሰ» ጊዱ ታማርሴቴሰ።

ጳውሎስ ሃ ኪታዛ ጳፊዳይ ቱሙ ጊዱዳ ኣማኖ ቲሚርቲ ታማርዲ ሄ ዎርዶ ኣሰታማሬታ ቲሚርቲዛ ዲጋናሳ፤ ኢዛ ማልሌታፔ ዋናቲዛይ፤ «ዬሱሰ ኪርሰቶሲ ኩሜላ ኣቶቴላ ኢሜሰ፤ ሃንኮይቲ ኣማኒዛ ኣማኖይ ጊዱኮ ዬሱሳፔ ሃሴቴሰ» ጊዛይሳ። ጳሲ ሃይሳ ኣላሜዛ ኪርሰቶሳን ሜዲዴሰ፤ ቃሴካ ጳሲ ሃ ኣላሜዛ ኪርሰቶሳ ባጋራ ባኮ ዛሪ ኤሃና፤ ሃይሲ ኣላሜዚ ኣታናይ ኪርሰቶሳ ዎዚናፔ ኣማኖን ጸላ። ሄሳን ኤቂዲ ጳውሎስ ሃይሲ ዎልቃማ ቲሚርቲይ ኣማኒዛይታ ዴኦን ዋኒ ዳናሰ ኮሺዛኮ ቤሴሰ።

ሃይሳ ሃ ኪታዛ ጳውሎሳፔ ኤኪዲ ቆላሲያሴ ኣሳሰ ጋላናሰ ከቲቲዳ ቲቂቆሳራ ኢሲፊ ዲዛይ ኣናሰሞሳ ጊዱዳይሳ ኤርይ ማዲዛዛ። ጳውሎስ ሄ ኣናሰሞሳ ጌቲቲዛ ኣይሌዛ ጊሻሰ ፒልሞናሰ ሃራ ኪታ ጳፊዴሰ። ቆላሲያሴ ኪታ ጊዶን ዲዛ ቆፋይ ኤፌሶኔ ኪታራ ኣዳፊ ጋይቴሰ፤ ናሞኣይካ ኢሲ ዎዴን ጳፊቲዳ። ኢሰታ ጊዶን ዲዛ ጊታ ዴማቴላ ኤፌሶኔ ኪታን ጳውሎስ ኪርሰቶሳ ዎሳ ኬላ ሁኤ ኦሊዲ ሺሼሰ፤ ቃሴ ቆላሲያሴ ኪታን ኪርሰቶሳ ሜዲቴላ ኡባሰ ሁኤ ኦሊዲ ሺሼሰ። ሃይሳ ኢዚ ኦሊዳይ ጳሲ ሜዲዳ ኪታንቻታሰ ጎይኖይ ኤያቴላ ጊዱዳይሳ ቤሳናሳ።

ሃ ማጸፋይ ኦይኪዳ ኩሜላ ቆፋ

ጌሎሶ 1:1-8

ኪርሰቶሳ ሃኖኔ ኢዛ ኦሶ 1:9—2:19

ኪርሰቶሳን ዲዛ ኦራላ ዴኦ 2:20—4:6

ኩሻ ቆፋ 4:7-18

¹ ጸሳ ሸኔን ዩሱስ ኪርሰቶሳን ኪቴቲዳ ጳውሎሳፔኔ ኑ ኢሻ ጸምቶሳፔ፡

² ቆላሲያሴን ዲዛ ኪርሰቶሳን ዴማቲዳይታሲኔ ኣማኔቲዳ ኢሻታሰ ኑ ኣዋ ጸሳፌ ሳሮቴሊኔ ኪያቴሊ ኢንቴሰ ጊዶ።

ጋላታ ዎሳ

³ ኑ ኢንቴ ጊሻሰ ዎሲዛ ኡባ ጋላሰ ኑ ጎዳ ዩሱስ ኪርሰቶሳ ኣዋ ጸሳ ጋላቶሰ።

⁴ ጋሶይካ ኢንቴሰ ዩሱስ ኪርሰቶሳን ዲዛ ኣማኖኒኔ ኣማኒዛ ኣሳ ኢንቴ ኡባ ሲቁዛይሳ ኑ ሲዪዳ ጊሻሳ።

⁵ ሄሲ ወሪካ ሃኒዳይ ሳሎን ኢንቴሰ ጊጌቲዳ ሂዶታፔ ዴንዲዳይሳና፤ ሄሳ ሄ ሂዶታ ጊሻሰ ሚሺራቾ ቃላ ኢንቴ ካሴቴዲ ሲዪዳታ።

⁶ ሄሲካ ሄ ኢንቴኮ ጋኪዴሰ፤ ሄሳ ሚሺራቾ ቃላ ኢንቴ ሲዮሶፔኔ ጸሳ ኪያቴላ ቱማቴላ ኢንቴ ኤሮ ጋላሳፌ ሃ ሲሚን ኣላሜ ዩሾን ኢዚ ኦሊሼ ዲዛይሳ ማላ ኢንቴ ኣቻን ኣይፌ ኣይፊሼኔ ዲጨሼ ዴሰ።

⁷ ሄሳካ ሃኢ ኑ ጊሻሰ * ጊዲዲ ኪርሰቶሳሰ ኣማኔቲዳ ኦሳንቻ ጊዲዳይሲኔ ኑናራ ኢሲፌ ኦሊዛኔ ሲቁዛ ኤጳፊራይ ኢንቴና ታማርሲዴሰ።

⁸ ቃሴካ ኢዚ ኢንቴናን ዲዛ ኣያና ሲቆቴላ ኑሰ ዮቲዴሰ።

⁹ ኑ ቃሴ ሄሳ ሲዮሶፔ ሃ ሲሚን ኢንቴ ጸሳ ሸኔ ኤራቴላኒኔ ኣኬካን ኢንቴና ኩንፋና ማላ ኢንቴ ጊሻሰ ዎሳ ቃንጸቤኮ።

¹⁰ ሄሳፉካ ጎዳሰ ቤሲዛ ዱሰ ዳና ማላ ኢንቴ ኢዛ ፖሊ ኡፋይሳና ማላ ሎኦ ኦሶ ኡባን ኣይፌ ኢማና ማላኔ ጸሰ ኤሮን ዲጨ ዲጨ ባና ማላ ኑ ኢንቴሰ ዎሶሰ።

¹¹ ጎዳይ ባ ጊታ ዎልቃን ባ ሚኖቴላ ኡባ ኢንቴሰ ኢዎ፤ ወርሲካ ኢንቴ ዴንዲያና ማላኔ ኡፋይሳን ጊጌቲዳይታ ጊዳና ማላ ኢንቴና ኢዚ ማዶ።

¹² ኣማኒዛይቲ ላቲዛሶ ፖኦ ካዎቴላ ላቲዛይታ ኑ ጊዳና ማላ ኑና ጋሊዳ ኑ ኣዋ ኢንቴ ጋላታናሳ።

* 1:7 ኑ ጊሻሰ፡ ኑ ጊሻሰ ጊዛይሳ ኢሲ ኢሲ ጌሻ ማጻፋታን ኢንቴ ጊሻሰ ጌቴቲዴሰ።

1:7 ቆላ 4:12፤ ፒልም 23

13 ኢዚ ኑና ቋማን ሃሬቴላፌ ኣሺዲ ጌዴ ባ ዶሲዛ ናዛ ካዎቴላን ፒንሲዴሰ።

14 ኑ ኢዛን ዎዜቲዲ ናጋራፔ ማሬቲዶሰ።

ኪርሰቶሲ ኡባፌ ቦላ

15 ኪርሰቶሲ ኣይፌን ቤቶንታ ጸሳሰ ቱሙ ሌሚሶ፤ ሜዴቴላ ኡባፌ ጌታኔ ባይራ።

16 ሜዴቴላ ወሪ ኢዛን ሜዴቴዴሰ። ሳሎኒኔ ሳኣን ዲዛይቲ፣ ኣይፌን ቤቲዛይቲኔ ቤቶንታይቲ ጌዲንካ፣ ዎልቃማታ ጌዲንካ፣ ሃሪዛይቲ ጌዲንካ ዎይኮ ጎዳቴላ ዲዛይቲ ሃኒዳይ ወሪካ ኢዛን ኢዛሰ ሜዴቴዴ።

17 ኢዚ ኡባፌ ካሴ ዴሰ፤ ወሪካ ኢሲ ቦላ ኦይኬቲ ሚኒዳይ ኢዛና።

18 ኢዚ ባ ኣሳቴላ ጌዲዳ ዎሳ ኬላይሰ ሁኤ፤ ኡባሰ ቦላ ጌዳና ማላ ኢዚ ሃይቂዳ ኣሳ ኡባፌ ኮይሮ ዴንዲዴሰ።

19 ሄሲካ ሃኒዳይ ኩሜላ ጸሳቴላይ ኢዛ ናዛን ዴኣና ማላ ጸሳ ኣዎ ሼኔ ጌዲዳ ጌሻሳ።

20 ማሰቃሌ ቦላ ኢዛፔ ጉኪዳ ሱላን ሳሮቴላ ሜዲዲ ሳኣ ቦላ ጌዲን ሳሎ ቦላ ዲዛይሳ ኡባ ኢዛ ባጋራ ባናራ ማቃዪንሲዴሰ።

21 ኢንቴ ኢታ ቆፋ ጋሶን ካሴ ኢንቴ ጸሳፌ ሻኬቲዲ ኢዛሰ ሞርኬታኮሺን።

22 ሃኢ ቃሴ ኢንቴ ቦላ ባላይኔ ዎሶይ ባይንዳ ጌሻታ ኦሊዲ ኢንቴና ባ ሲንላ ሺሻናሰ ኪርሰቶሳ ኣሾ ሃይቆ ባጋራ ጸሲ ኢንቴና ባናራ ማቃዪንሲዴሰ።

23 ሄሲካ ሃናናይ ኢንቴ ኣማኖን ጸጽዲኔ ጊጌቲ ኢንቴ ኢንቴ ኣማኖን ኤኪዳ ሚሺራቾ ቃላፔ ቃጸንታ ሚኒ ኤቂኮና፤ ኢንቴሲኔ ሳሎ ጉፋንሶን ዲዛ ሜዴቴላሰ ሳባኬቲዳ ሚሺራቾ ቃላይ ሄሳ። ታ ጳወሎሲካ ሃይሳ ሃ ሚሺራቾ ቃላሰ ኦሳንቻ ጌዳዲሰ።

ጳወሎሲ ዎሳ ኬላ ጌሻሰ ኤኪዳ ዎዬ

24 ታ ኢንቴ ጊሻስ ዋዬ በኢዳይሲ ሃኢካ ታና ኡፋይሴስ፤ ከርስቶሲ ባ ኣሳቴል ሄሲካ ዋሳ ኬፋ ጊሻስ ኢዚ ኤኪዳ ዋዬዛፔ ኤኪሽን ፓጪዳይ ዲኮ ታኒ ታ ኣሾን ኩንፋና።†

25 ጸሳ ቃላ ታ ኢንቴስ ፓጪዳይ ባይንዳ ጋፋና ማላ ታስ ጸሳፊ ኢማቲዳ ሃዳራ ማላ ታ ዋሳ ኬፋ ኦሳንቻ ጊዳዲስ።

26 ሃ ቃላይ ቤኒ ዋዴፔኔ ካሴ ዩሌታፔ ጌሚዲ ጸራ ጊዲ ጋምኢዴስ፤ ሃኢ ጊዲኮ ኣማኒዛይታስ ኡባስ ቆንጪዴስ።

27 ጸሲ ባ ኣሳስ ቆንጪሳናስ ኮዬዳ ጸራይ ኢዛ ቦንቾ ዱሬቴል ኣይዛቤ ጊዲዳ ኢንቴ ጊዶን ኣይ ማላ ጊታኮ ቤሳናሳ፤ ኢዚካ ኢዛ ቦንቾ ሂዶታ ጊዲዳ ኢንቴ ጊዶን ዲዛ ከርስቶሳ።

28 ኑኒካ ኢሲ ኢሲ ኣስ ከርስቶሳስ ኩሜፋ ኣስ ሂስቲ ሺሻናስ ዳንዳያና ማላ ኣስ ኡባ ሂላራ ዞሬሼኔ ታማርሲሼ ከርስቶሳ ጊሻስ ሳባኮስ።

29 ጸሲ ባ ጊታ ዋልቃን ታናን ኦሊዛ ጊሻስ ሄ ዋልቃን ባጼታሼ ሄ ቆፋ ፖላናስ ዳፊታይስ።

2

1 ኢንቴ ጊሻሲኔ ሎዶቂያን ዲዛይታኔ ሄሳዳካ ታና ባ ኣይፌራ ቤዬ ኤሮንታ ኣሳ ኡባስ ታ ኣይ ማላ ባጼቲዛኮ ኢንቴ ኤራና ማላ ታ ኮያይስ።

2 ቃሴካ ኢስታ ዋዚናይ ሚናና ማላኔ ኢስቲ ሲቆቴፋን ኢሶይ ኢሳራ ኦይኬታና ማላ ኩሜል ጊዲዳይሳ ዩሺ ቆፒ ኤሮን ዱሬቴል ዴሚዲ ጸሳ ጸራ ጊዲዳ ከርስቶሳ ኢስቲ ኤራና ማላ ታ ዳፊታይስ።

3 ቆታን ዲዛ ጪንጫቴሊኔ ኤራቴፋ ሃሮይ ዉሪካ ቤቲዛይ ከርስቶሳ ኣቻና።

4 ኦኒካ ኢንቴና ዶና ማልኤልን ባሌልንታ ማላ ታ ኢንቴስ ዮታይስ።

5 ታ ኢንቴፊ ኣሾ ኣይፌን ሃካ ዲኮካ ኣያናን ኢንቴናራ ኢሲፊ ዳይስ፤ ኢንቴ ዋጋራ ዲዛይሳኔ ኢንቴ ከርስቶሳ ሎኤል ኣማኒዛይሳ ቤያዳ ታ ዳሮ ኡፋዬታይስ።

ከርስቶሳን ቤቲዛ ኩሜፋ ዴኦ

† 1:24 ጳውሎሲ ሃይሳን፡ «ኢዚ ኤኪዳ ዋዬዛፔ ኤኪሽን ፓጪዳይ ዲኮ ታኒ ታ ኣሾን ኩንፋና» ጉሲ ናጋራ ማራና ዳንዳይዛ ከርስቶሲ ኦሊዳ ኦሶፔ ኣቲዳይሲ ዴስ ጉስ ጊዴና፤ ሃይሳን ጳውሎሲ ጊዛይሲ ከርስቶሲ ኣሳ ናጋራ ጊሻስ ማስቃሌ ቦላ ካቂቲዳይሳ ሳይዳ ሃ ኣሳሚይስ ሚሺራቾ ቃላ ዮቲሼ ኢዛ ዋዬዛ ሻኬቲዛይሳ ቤሴስ።

6 ሄሳ ጊሻስ እንቲ ጎዳ ዩሱስ ኪርሰቶሳ ኣማኒዳ ማላ ኢዛን ዴኢቲ።

7 እንቲ ኢዛን ቶኬቲዲኔ ኬጾቲዲ እንቲ ታማርዳ ማላ ኣማኖን ሚኒዲ ዳሮ ቲርፓ ጋላታ ኢዛሰ ሺሺሼ ዲቲ።

8 ኪርሰቶሳን ጸጵዳዝ ጊዶንታ ኣሳ ዋጋኒኔ ጎኣይ ባይንዳ ሃ ኣላሜዛ ላፋ ዋጋን ኤቂዳ ኣሳ ኤራቴላኒኔ ጮ ባሌሶ ሃሳያን እንቲና ኦኒካ ዲኦንታ ማላ ናጌቲቲ።

9 ጋሶይካ ኩሜላ ጸሳቴላይ ኢዛ ኣሳቴላን ዴሰ።

10 እንቲካ ሃሪዛይታሲኔ ጎዳታ ኡባስ ሁኤ ጊዲዳ ኪርሰቶሳን ኩሜላ ጊዲቲ።

11 እንቲ ኢዛን ቃጸሬቲዴታ፤ ሄሲ ሄ ቃጸራዚካ ናጋራ ጊዲዳ ኣሾ ቆፋ ዲጋናስ ኪርሰቶሳን ሃኒዲይሳ ኣቲን ኣሳ ኩሼን ሃኒቤና።

12 ጸንቃታን ኢዛራ ኢሲፌ ሞጌቲዴታ፤ ኢዛ ሃይቆፔ ዴንሊዳ ጸሳ ዋልቃን ኣማኒዲ ቃሴካ ኢዛራ ኢሲፌ ዴንዲዴታ።

13 እንቲ ካሴ እንቲ ሞርኒኔ እንቲ ኣሾ ናጋራ ሃኖቴላ እንቲፌ ዲጎንታ ኣጊዳ ጊሻስ ሃይቂዳይታኮ ሺን ጸሲ እንቲና ኪርሰቶሳ ባጋራ ፓሊዴስ፤ እንቲ ናጋራካ ኡባ ኣቶ ጊዴስ።

14 ካሴ ኦና ሞቲሼኔ ኦናራ ኤቂቲሼ ዲዛ ሙሴ ዋጋን ኣጮ ሞቶስ ጸፊቲዲይሳ ቁጪ ዲጊዴስ። ማሰቃሌ ቦላ ቶርጊዲ ኦ ቦላፌ ዲጊዴስ።

15 ሃላቃታኔ ጎዳቲዛይታ ጎዳቴላ ኢስታፌ ዋሊ ኤኪዲኔ ማሰቃሌ ቦላ ሃይቂዲ ጸኒ ዴንዲዲ ዲኤቲዲይታ ቆንጩን ዩሺ ቤሲዴስ።

16 ሄሳ ጊሻስ ሙሳን ዋይኮ ኡሻን፤ ኢሲፌ ቦንቾን ዋይኮ ኣጊና ጴርኒኔ ሳሞባታ ጋላስ ቦንቾ ጊሻስ እንቲ ቦላ ኦኒካ ፒርዶፎ።

17 ሄይቲ ዉሪካ ቡሮ ያና ሃኖታስ ኤሾታ ጊዲሺን ዋና ኣሳቴላይ ጊዲኮ ኪርሰቶሳ።

18 ቤሶንታ ኣሽኬቴሊኔ ኪታንቻታስ ጎይኖ ዶሲዛ ኣሲ ኦኒካ እንቲና ቋጲዲ ሜላ ኣሾንታ ማላ ናጌቲቲ፤ ሄሳ ማላ ኣሲ ባ ቤኢዳ ኣጉሞስ ዋጋይ ባይንዳ ባና ናሺሼ ሃዳ ኣሾ ቆፋን ኩሚዲ ኦቶሬቲስ።

19 ሄሳ ማላ ኣሳሰ ሁኤ ጊዲዳ ኪርሰቶሳራ ኣይኮ ጋይቶቴሊካ ዴና፤ ኩሜላ ኣሳቴላ ሻያኒኔ ኮልሼን ኦይሴሊ ዲቺዛ ሁኤይ ኪርሰቶሳ፤ ጸሲ ኪርሰቶሳ ኣሳቴላ ኩሜላ ዲቺዛይ ሄሳ ማላና።

ዋርዶ ቲሚርቴፌ ናጌቴስ

20 ሃይሳ ሃ ኣላማዛ ዋጋስ ኢንቴ ከርሰቶሳራ ሃይቂዳይታ ጊዲኮ ሂሰቲን ሃኢ ኣዛስ ሄ ዋጋስ ሃሬቴቲ?

21 ሄ ዋጋቲ ኦይኮፋ፥ ላጫ ቤዮፓ፤ ቦቾፋ ጊዛይታ።

22 ሃይቲ ወሪ ኣሳ ኣዛዘኒኔ ኣሳ ቲሚርቴን ዋጂዳ ዋጋታ ጊዲዳ ጊሻስ ኦሴቲዳፔ ጉዬ ጮ ጳያናስ ዳቴስ።

23 ሃ ኣዛዘቲ ባርካ ባፔ ሜጂ ኤኪዳ ጎይኖ ቆፋይ ጮ ቤሶንታ ኣሽኬቴሴ ካ ኣሳቴስ ናቂ ኦይሳን ኢስታስ ቱሙ ኣጵ ኤራቴሴ ዲዛይታ ሚሳቴቴስ፤ ጊዶ ኣቲን ኣሾ ኣሞቴስ ሺሺ ኦይኪዛ ዋልቃይ ኢስታስ ባ።

3

ጌሻቴላ ዲሳስ ማዲዛ ዋጋ

1 ሂሰቲኮ ኢንቴ ከርሰቶሳራ ኢሲፌ ዳንዲዳይታ ጊዲኮ ከርሰቶሲ ጸሳ ኣቻን ኡቲዳሶሆን ፑዴን ዲዛ ሃኖቴላ ኮዪቴ።

2 ኢንቴ ቆፋይ ፑዴ ቦላን ዲዛ ሚሻ ቦላ ጊዶ ኣቲን ሃ ቢታ ዮኦ ቦላ ጊዶፖ።

3 ጋሶይካ ኢንቴ ሃይቂዳይታ ኢንቴ ዳይይካ ከርሰቶሳራ ጸሳ ኣቻን ቆቴቴዳስ።

4 ኢንቴስ ዳኦ ጊዲዳ ከርሰቶሲ ቆንጪዛ ጋላስ ኢንቴካ ሄ ዋዴ ኢዛራ ኢሲፌ ቦንቾራ ቆንጫና።

5 ሄሳ ጊሻስ ኢንቴስ ቢታ ቦላ ዲዛ ኣሞቴስ ዲጊቴ፤ ሄይቲካ ላይማ፥ ቱናቴስ፥ ኣሾ ኣሞ፥ ኢታ ኣሞቴሴ ኤቃስ ጎይኖ ማላ ጊዲዳ ጋጺጋጾ።

6 ሄይታንታ ጋሶን ጸሳ ሃንቆይ ጸሳስ ኣዛዜቶንታይታ ቦላ ያና።

7 ኢንቴካ ካሴ ዲዛ ዲሳን ሄ ሚሻታ ኦሊዴታ።

8 ሃኢ ጊዲኮ ሃንቆ፥ ዪሎ፥ ጫሼ፥ ዚጊርሲኔ ዬላሲዛ ሃሳያ ሄይታንታ ሚሳቴዛይታ ኡባ ዲጊቴ።

9 ካሴ ጩጋ ኣሳቴስ ኢዛ ኦሶራ ጋሊ ኢንቴፌ ቃሪ ዬጊዳ ጊሻስ ኢንቴ ኢንቴ ጋርሳን ኢሶይ ኢሳራ ዋርዶ ሃሳዮፒቴ።

10 ባና ሜጂዳይሳ ሚሳታና ማላ ኤራን ኦራጺዳ ኦራላ ኣሳቴስ ማይኢዴታ።

11 ሄን ጊሪኬ ኣስ ጊዲን ዋይኮ ኣይሁዳ ኣስ ዋይኮ ቃጸሬቲዳይታ ዋይኮ ቃጸሬቶንታይታ ዋይኮ ታማርዳይታኔ

ታማርንታይታ ዋይኮ ማሬቶንታይታ ዋይኮ አይሌ ዋይኮ ጎቃ ጌቴቲዛ ዱማቴሌ ዴና፤ ኪርሰቶሲ ሄይታንታ ኡባሳ፤ ቃሴ ኡባንካ ዴሰ። *

12 ሄሳ ጊሻሰ ዱማ ጊዲዲ ዶሴቲዳይቶ! ኢንቴ ጸሳስ ዶሬቲዳይታ ጊዲዳ ማላ ሚሼቴሌኔ ኪያቴላ፤ አሽኬቴላ፤ ቦንቾኔ ዳንዳያ ማይኢቴ።

13 ኢንቴ ኢሶይ ኢሳ ዳንዳይቴ፤ ኢንቴፌ ኢሳዴይ ኢሳዴ ቦላ ሚሼቲኮ ዮኦይካ ኢዛ ቦላ ዲኮ ኢሶይ ኢሳሰ አቶ አቶ ጌቴቲቴ፤ ጎዳይካ ኢንቴሰ አቶ ጊዳ ማላ ኢንቴካ ሃራ አሳሰ አቶ ጌቴ።

14 ሄሳ ኡባ ቦላ ኩሜላ ኢሲፌቴላን ሺሺ ቃቺዛ ሲቆ ማይኢቴ።

15 ኢንቴ ዉሪካ ኢሲ አሾ ጊዲዲ ሳርቴላሰ ጴይጌቲዳ ኪርሰቶሳ ሳርቴሌ ኢንቴ ዋዚናን ካዎቶ፤ ኢንቴ ጋላቲዛይታ ጊዲቴ።

16 ኪርሰቶሳ ቃላይ ኢንቴናን ኩሜላ ጊዶ፤ ኢንቴ ኢንቴ ጋርሳን አቶ ኤራቴላን ታማርቴኔ ዘሬቲቴ፤ ዩላኒኔ ሳባን አያና ዩላን ጋላታራ ጋሌ ኢንቴ ዋዚናራ ጸሳሰ ዩጺቴ።

17 ኢዛ ባጋራ ጸሳ አዋሰ ጋላታ ሺሺሺ ቃላን ጊዲን ዋይኮ ኦሶን ኢንቴ ኦሌዛይሳ ኡባ ጎዳ ዩሱሳ ሱጎላን ኦሌቴ።

አማኒዛ አሳይ ባሶ አሳ ካሌሊዛ ዋጋ

18 ማቼቶ! ጎዳ አቻን ኢንቴሰ ቤሲዛ ሚሽ ጊዲዳ ጊሻሰ ኢንቴ አዚናታሰ አዛዜቲቴ።

19 አዚናቶ! ኢንቴ ኢንቴ ማቼታ ሲቂቴኔ ኢሰታሰ ሜንጼ ኢቶፒቴ።

20 ናይቶ! ኢንቴ ጎዳ ኡፋይሳና ማላ ኢንቴ ኢንቴና ዩሊዳይታሰ ኡባ ሚሻን አዛዜቲቴ።

21 አዋቶ! ናይቲ ሂዶታ ቃንጸንታ ማላ ኢንቴ ናይታ ሃንቄላፍቴ።

22 አይሌቶ! አሰ ኡፋይሳናሲኔ ጮ አይፌሶን ቤታናሰ ጊዶንታ ሱሬ ዋዚናፔ ኢንቴ ጎዳሰ ባቢቴ፤ ሃይሳ ሃ ቢታን ሃሪዛ ጎዳታሰካ ሃኖ ኡባን አዛዜቲቴ።

23 ኢንቴ ኦሌዛ ሚሽ ኡባ አሳሰ ጊዶንታ ጎዳሰ ኦሌዛ ማላ ታይቢዲ ኩሜላ ዋዚናፔ ኦሌቴ።

* 3:11 ታማርዳይታኔ ታማርንታይታ ጊዛይሲ ካሴ ኮይሮ ገሪኬ ቃላን ባርባሪያኔ አሲኩቴ ጉሲ ጊዲሺን ኢዚካ ዋራ ጊዶፌ ዪዳ አሳታኔ ገሪኬ ቃላ ኤርንታይታ ቤሴሰ

3:12 ኤፌ 4:2 3:13 ኤፌ 4:32 3:18 ኤፌ 5:22፤ 1ጴጽ 3:1 3:19 ኤፌ 5:25፤ 1ጴጽ 3:7 3:20 ኤፌ 6:1 3:21 ኤፌ 6:4 3:22 ኤፌ 6:5-8

24 ኢንቴ ጎዳ ኣቻፌ ኢንቴ ኦሶ ማላ ኤካናሰ ላታይ ዲዛይሳ ኢንቴ ኤሬታ፤ ኢንቴ ኦሊዛይ ጎዳ ዩሱስ ኪርሰቶሳሳ።

25 ቆሆ ኦሊዳዴይ ባ ኦሊዳሪ ኩሼ ኤካና፤ ኢዛ ኣቻን ዲማ ማዶይ ዴና።

4

1 ጎዳቶ! ኢንቴሰ ሳሎን ጎዳይ ዲዛይሳ ኢንቴ ኤሪዛ ጊሻሰ ኢንቴሰ ኦሊዛይታሰ ቱማኒኔ ሱሬቴላን ኦሊቴ።

ጉጃ ዞሬ

2 ቤጊዲ ጋላታራ ጋሊ ፓጩይ ባይንዳ ጸሳ ዎሲቴ።

3 ታ ኢዛ ጊሻሰ ቃሹቴዳ ኪርሰቶሳ ጸራ ኣዋጃናሰ ዳንዲያና ማላ ጸሲ ኩሰ ቃላ ዮታናሰ ኦጌ ዶያና ማላ ኑ ጊሻሰካ ዎሲቴ።

4 ቃሴካ ሃሳያናሰ ቤሲዛ ቃላ ቆንጩን ታ ሃሳያና ማላ ታሰ ዎሲቴ።

5 ኣማኖንታ ኣሳታራ ኢንቴሰ ዲዛ ሃኖቴላን ኣፆ ኤራቴላን ሲሜሬቴቴ፤ ኢንቴሰ ቤቴዳ ሎኦ ቃዳን ጎኤቴቴ።

6 ኢሶይ ኢሳሰ ኢንቴ ዛር ዎሰቴ ኢማናኮ ኢንቴ ኤራና ማላ ኢንቴ ሃሳያይ ማጺኔራ ካጺዳ ካላ ማላ ማልኦ ጊዶ።

ወርሴላ ሳርካ

7 ቲቂቆሲ ታ ዲሳ ጊሻሰ ወርሲ ኢንቴሰ ዮታና፤ ኢዚ ዳር ዶሴቴዳ ኢሻኔ ጎዳሰ ታናራ ኢሲፌ ኦሊዛ ኣማኔቴዳ ኦሳንቻ።

8 ኑ ዲሳ ጊሻሰ ኢንቴ ኤራና ማላኔ ኢንቴ ዎዚና ሚንላና ማላ ታኒ ኢዛ ኢንቴኮ ኪታዲሰ።

9 ኢዚ ኢንቴ ባጋ ጊዲዲ ኣማኔቴዳዴኔ ዶሴቴዳዴ ጊዲዳ ኑ ኢሻ ኣናሰሞሳራ ኢንቴኮ ያና፤ ኢሰቴካ ሃን ዲዛ ሃኖዛ ኡባ ኢንቴሰ ዮታና።

10 ባርናባሳ ኣዋ ሚቹይ ና ማርቆሲኔ ታናራ ኢሲፌ ቃሹቴዳ ኣርጺርኮሲ ኢንቴና ሳር ጌቴሰ። ማርቆሳ ጊሻሰ ኢንቴ ኣይ ኦላናኮ ካሴ ኢንቴና ታ ቆፍሳ ዎሊዳ ማላ ኢዚ ኢንቴኮ ጋኪሺን ኢዛ ሞኪ ኤኪቴ።

11 ኢዮሰጸሳ ጌቴቴዛ ኢያሶይካ ኢንቴና ሳር ጌሰ፤ ኣይሁዳ ኣሳ ጊዶፌ ጸሳ ካዎቴላሰ ታናራ ኦሊዛይቴ ሃይታንታ ጸላ፤ ኢሰቴ ታና ሚንሴሊዳ።

¹² እንቴ ባጋፌ ጊዲዳ ዬሱስ ኪርሰቶሳ ኦሳንቻ ኤጳፊራይ እንቴና ሳሮ ጌስ፤ ኢዚካ እንቴና ኣያና ዲሳን ሎኤል ሚኒዲ ሙሌራ ዋፑ ጊዲ ጸሳ ሼኔን ሚኒ ኤቃና ማላ ኡባ ዋዴ እንቴ ጊሻስ ዋሳን ባጼቴስ።

¹³ ቃሴካ እንቴ ጊሻስ ሄሳቶካ ሎዶቂያኒኔ ኢያርፖሊሴ ካታማን ዲዛይታስ ኢዚ ፓጩይ ባይንዳ ኦልዛይሳ ታ ኢዛ ጊሻስ ማርካታይስ።

¹⁴ ዳሮ ዶሴቲዳ ኣኪሜ ሉቃሲኔ ዴማሲ እንቴና ሳሮ ጌቴስ።

¹⁵ ሎዶቂያን ዲዛ ኑ ኢሻታስ፤ ኒምፑሲኔ ኢዚ ኬፋን ሺቂዛ ኣማኒዛ ኣሳታስ ታ ሳሮካ ዮቴቴ። *

¹⁶ ሃና ታ ኪታያ እንቴስ ናባቤቲዳ ማላ ቃሴካ ሎዶቂያን ዲዛ ዋሳ ኬፋይን ናባቤታና ማላ ኦልቴ፤ እንቴካ ቃሴ ሎዶቂያፔ እንቴስ ኪቴቲዳ ኪታ ናባቢቴ።

¹⁷ ኣሪኪጸሴስ፡ «ኔኒ ጎዳፔ ኤኪዳ ኦሶዛ ወርሴል ጋፋናስ ሚና» ጌቴ።

¹⁸ ሃይሳ ሳሮካ ታኒ ጳዉሎሲ ታ ኩሼራ ጸፋዲስ፤ ታ ቃሼታ ዲዛይሳ ዶጎፒቴ፤ ጸሳ ኪያቴል እንቴናራ ጊዶ።

4:12 ቆላ 1:7፤ ፒልም 23 4:14 2ጸም 4:10-11፤ ፒልም 24 * 4:15 ኒምፑሲኔ ኢዚ ኬፋን ዲዛሪስ ጊዛይሳ ኢሲ ኢሲ ቢርሹላ ማጻፋቲ ኒምፑሴሲኔ ኢዛ ኬፋን ሺቂዛ ኣማኒዛ ኣሳታ ጌቴስ 4:17 ፒልም 2

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b